

Equis, teste Maphæo, utuntur. Cuius commentum tale est. Cantherio seu tigno dodrantalis ferme crassitudinis, pedum octo longitudinis, Bubulum corium ad sellæ amplitudinem extendunt, huic ephippio divaricatis cruribus Viator insidet: Baiuli succollant duo, & ubi longum iter est, succedunt alij. Abundat etiam Zibethis, Animalib. formam Felis nostræ domesticæ habentib. sed paullo minoribus. Habent autem in se Odoramenti genus quoddam pretiosi quod & *Zibethum* dicitur. Nutrit insuper Aves omnis generis, inprimis Psittacos virides & cinericios: Struthiones item, Pavones & Gallinas Indicas, Perdices & Anates: habet & Phasianes, Columbas, Turtures, & minorum Avium quæ *Becca-fichi* Incolis dicuntur, infinitum humerum, Aquilarum præterea, Falconum, Accipitrum fringilliariorum, Pellicanorum magnam vim. Sunt & multe Ardez candidæ, *Aves Regia* dictæ, ac aliæ Gruibus similes, quas Incolæ vocant *Flemminges*. Dividitur autem Regnum Congi in Provincias sex, *Bamba, Songo, Sundi, Pango, Batta, & Pemba*. *Bamba* littoralis est, ab Ambrizi flumine ad Coanzam usque: regitur a varijs Præfectis, quos ipsi *Mani* vocant, primaria urbs est *Panza*, sita in planicie quæ est inter fluvium *Loze* & *Ambrize*. Hic moratur præfectus provinciæ, distatque a Mari c. m. pas. *Songo* ad flumen *Zaire* sita est. primaria urbs est *Songo*, in qua præfectus huius provinciæ agit. *Sundia Congi* urbe ad fluvium usque *Zaire* protenditur, Metallorumque variorum copia abundat. Incolæ ferrum ceteris præferunt, quod ex eo gladii, cultri, arma cudi possint: habent & zebelinos & Martes, aliaque Animalia quæ in ceteris quoque provincijs inveniuntur. *Pango* a Septentrione Sundi contermina, a Meridie Batta, ab Occasu Comitatu Congo, & ab Ortu montibus Solis terminatur. Urbs primaria in qua præfecti degunt provinciæ cognominis est, diciturque *Pango*. *Batta* quinta provincia: ejus fines sunt a Septentrione pango, ab ortu extenditur ad montes Solis, & ad radices Montium Salnitri. Et a Meridie usque ad Montem Brusciato. Hisce finibus *Batta* terminatur, atque urbs eius primaria, in qua princeps habitat, similiter *Batta* dicitur. Sexta & ultima provincia *Pemba* sita est in meditullio Regni Congi. In hac sita est totius Regni urbs primaria & Regia, Hæc hodie *S. Salvatoris* nominatur, olim vero dicta fuit *Banza*, quæ vox significat Aulam in qua Rex aut Præfectus plerumque agit. Sita c. 101 mill.